



- EDITORIAL • RÂL VÊNGTU • CHHÛNGKAW CHANCHIN
- » Synod Moderator-in Jail tângte Krismas leh kumthar hmanpui
- » Operation Nehemia Open Air Service
- » Bial thar hawn leh Pastor Induction

RNI 68092/83 Regn. No. N.E. 1024
From
Synod Literature & Publication Board
Synod Office, Aizawl - 796 001
Mizoram. Phone: 0389-2324590

SYNOD *Newsletter*

Volume XXXIII

No. 413

E-mail: synodnews@gmail.com

JANUARY, 2018

LÂWRKHAWM

Synod Moderator

KUM THAR THUCHAH



Rev. F. Lalrinnunga

DOCTORATE DEGREE DAWNG THAR

Rev. R. Vanlalnuanga, Lecturer, ATC chuan December 7, 2017 khân Senate of Serampore College (University) at angin Christian Ministry (Counselling) subject-ah Doctor of Theology (D.Th.) degree a dawng thar.

WOMEN CENTRE-A PUAN THUI LEH PUAN TAH ZIR TUR

January 11, 2018 khân Mizoram Presbyterian Kohhran Hmeichhe enkawl Women Centre, Phunchawng Vênga puan thui leh puan tah zir tûr bul ãanna inkhâwm hman a ni a. Central Kohhran Hmeichhe Committee-ten an hmanpui. Puan thui zir lâk vawi linaa lâk mi 40-in an zir ang a, puan tah zir lâk vawi hnihnaa lâk mi parukin an zir thung ang.

PCI GA EXECUTIVE COMMITTEE

Presbyterian Church of India General Assembly hnuai Executive Committee chu ruahman lâwk angin January 16&17, 2018 hian Silchar Mission Compound-ah an ãu. Kumin April thlaa General Assembly atâna inbuatsaihna a nih tel avângin thu pawimawh tak tak an rêl a, PCI GA Office, Shillong-a ãu tûr Executive Secretary pakhat an thlang thar bawk.

LUNGLEIAH COUNSELLING CENTRE HAWN A NI

Synod hnuai chhûngkaw inkaihhraina lam rawngbâwl hna kengtu Family Guidance & Counselling Centre (FG&CC) chuan January 23, 2018 chawhnu dâr 3:00 hian Lunglei Bazar Vêngah Counselling Centre a hawng thar. He Centre hi Synod Moderator Rev. F. Lalrinnungan a hawng a, FG&CC Director thar Rev. Lalsângbera leh O/A Upa H. Lalchhandama te an kal phei bawk. He Centre tharah hian Synod chuan Counsellor atân Nepal Mission Field Secretary term hnih hmang zo, Rev. Lalrintluanga Ngênte a dah a ni.

Thuthlung Hluia hruaitu ropui Mosian Israel fate hnêna a thuchah hnuhnûng leh thu rochhiah pawimawh ber mai chu, “Aw Israel mite u, ngaithla teh u, Lalpa kan Pathian chauh chu Lalpa a ni a; Lalpa, in Pathian chu in thlung zawng zawngin, in rilru zawng zawngin, in chakna zawng zawngin in hmangaih tur a ni,” tih hi a ni (Deut 6:4,5). He thu a sawi chhan hi Deuteronomy bung 6 tîr lamah Chiang takin kan hmu a, chu chu, ‘an luah tûr ram (Kanaan)-a an chên rei theih nân te, an hmuingîl theih nân te, an lo pun theih nân te’ a ni.

Aigupa ram ata hruai chhuaktu Mosia chuan uluk takin Kanan ram an thlen huna an awm dân tûr leh an ngaih pawimawh êm êm tûr leh an zawm ngei ngei tûr thu rochhiah a sawi a. He thu hi a ngai pawimawh tih a lang Chiang hle mai, “He thu hi in thlungah a châm reng ang a, in fate thahnemngai takin in zirtîr ang a, in ina in thut lai te, kawng a in kal lai te, in mut lai te, in thawh hun tein in hrilh tûr a ni,” tiin thupêk a pe zui zat mai. Tin, bân bunah, chal hrênah dah tûr a ni a, luh leh chhuah paha hmuh mai tûrin kawngka biangah leh kawngkhârah pawh târ tûr a la ti leh zêl a ni.

Hetieng taka thu pawimawh hi Israel faten an zâwm tâwk lo deuh niin a lang a, Pathianin ram a pêk, Kanaan rama an chên dân kan en hian Pathian an hmangaih tâwk lo deuh a ni ang. Josua hovin Kanaan ram an la a, an chêng ngâl a, Josua thih hnuah khân kum 200 vêl chu hruaitu mumal nei lovin an awm a, harsatna an tawha chhan chhuaktu tûr rorêltute Pathianin a pe thîn. Chumi hnuah lal pathum – Saula, Davida leh Solomona te lal laiin kum 120 vêl chu hnam inpumkhatin an awm leh a, Solomona hnuah chuan Israel ram leh Juda ram inthen darhin anmahni ngei pawh inngeih loh châng an nei ta hial mai. Kum 200 vêl hnuah Israel ram, hnam 10-te chu Assuria sawrkârin an hneh a, chîm ralin an awm a. Chumi hnuah Juda ram chu Babulon sawrkâr awpna hnuaiawh awmin, kum 70 chhûng zet salah an tâng leh ta. Sal tâng kîr leh hnuah pawh sawrkâr pângngaia ding thei tawh lovin hnam dang awpna hnuaiawh an

awm deuh reng mai. Grik sawrkâr hnuaiawh te, Rom sawrkâr hnuaiawh te an awm chho zêl a; kum 1947-ah independence hmuin Davida hun laia an ram neih hmun thuma ãhena hmun khat ang vêl lek changin an ram chu indona ramah a chang a ni ringawt mai a nih hi!

Kan ram pawh hi Pathianin tuipei râl at angin min rawn zawng chhuak a, ram min pe a, kan vânni hle mai. Israel-te hnêna Pathian thuthlung ang tho kha kan ram hian thuthlung kan dawn chu a ni. He rama kan chên rei theih nân te, kan hmuingîl theih nân te, kan lo pun zêl theih nân te Pathian kan hmangaih a ngai. A hnam thlan, Israel-te pawh hetianga Pathianin a hrem chuan keini pawhin Pathian hremna chu kan pumpelh hauh lo vang. Pathianin ram min pêk ngei te pawh chuhpuitu kan nei ta zêl a, kan ramri a zîm tial tial sawi a ni a, hnam dang an pun chak viau laia kan pun ve mang loh chuan chîm ral mai awlsam tak dinhmunah kan ding tih chu hai rual a ni lo. Pathian kan hmangaihna a tlâk hniam avângin kawng hrang hrangin harsatna kan tâwk nasa tial tial tiin a sawi theih âwm e.

Pathian hmangaih deuh deuh tûr kan nih laiin chumi lam hnuchhawnin kan thalaite hi zû, ruihhlo leh mipat hmeichhiat hman khawlohna lamah an tlan nasa hle mai, hêng sualna leh a kaihhnawih avâng hian kum tin a sâng têt an thi thîn a nih hi. Tûn anga thil a kal zêl chuan kan pung chak thei dawn lo tih a Chiang hle. Kum kal taah khân vêng tinah thalai, a bîk takin mipa an thi tam hle. Sual kalsana Pathian hmangaih zual deuh deuh

Phek 2-naah chhunzawm...

SYNOD Newsletter

EDITORIAL STAFF

Rev. Dr. C. Chawngmingliana
 Rev. PC Pachhônga
 Upa H. Ronghâka
 Rev. R. Laldinthara


Editorial

NGAIHTUAH DÂN THAR THA ZÂWK

Kum kal ta kha kan thlîr kîr chuan Mizoramah thalai leh pa valai, kum 15-50 inkâr kan vui liam tam hle mai. Kohhran tin report tlângpui han hriatin hmeichhia aiin mipa thi an tam zâwk a, kohhran thenkhat phai chuan mitthi hmun thuma thena hmun hnih zet chu mipa an ni. Pulpit rawngbâwltu tam tak chuan kan ram tui tlan hi a hrisêl lo va, kan ram hi a dam lo niin an sawi thîn. Dik pawh a dik thawkhat kan ti thei âwm e.

Dam lo chuan ngai a awh reng chuan hniam lam a pan thîn ang hian kan ram a dam lo ti chungah kohhranhoten kan tih dân ngai renga thil kan tiha kan ngaihtuah dân ngai renga thil kan ngaihtuah chuan chhiat lam kan pan tial tial dâwn tih a Chiang a. Chuvângin he kum tharah hian kan ram a lo hrisêla a lo dam theihna tûrin ngaihtuahna fîm hmanga jawngtâina nen theih tâwp kan chhuah a ngai hle mai.

Kum 2018 hi kum nga lo kal leh tûr chhônga kan ram rorêltu thlan thar kum a lo ni ta bawk a. Khawvêl inlûm let chak takah hian he inthlan pui hi kan ram leh hnam ke pên zêlna tur kawng sialna pawimawh tak a ni dâwn. Mi tinin kan ngaihtuah dân pangngai sahuai thing vawn tlut lovin Pathian ropuina tûr leh kan ram damna tûr dah chungnung ber îla, chumi aţanga thu tlûkna siam tûr chuan fîmkhur leh uluk takin ngaihtuahna i hmang ang u.



LALPA
 in Pathian mit chu
 kum thar aţanga
 a tâwp thlengin a fu
 reng thîn.

Deut 11:12

Moderator kum thar thuchah chhonzawmna...

tûra kan thilung kan siam thar a nih ngawt loh chuan kan hnam hi kan ral thei tih i hria ang u. Ei leh bâr kan zawmna kawngah te, kan nun dân pêng hrang hrangah te hian kan ram hi kan hmuingil em le? “Tih nuam tak leh thu awih taka in awm chuan in ram thil tha hi in ei ang; nimahsela, in duh lohva in hel chuan khandaihin a ei zo ang che u,” tia Bible a kan hmuh hi Pathian thu ding rengah kan ngai em?

Kan ram leh hnam damna tûr chu kan sawi tâk ang hian Pathian, min zawng chhuaktu hmangaih ber hi a ni tih Bible aţangin a Chiang a. Ram hruaituten Pathian ram leh a chhônga chêng Pathian mite an enkawl tih hriain Pathianin a Fapa nunna hial pea a tlante hi hmangaih taka an enkawl a pawimawh a. Mipui lam pawh hi min enkawltu, kan ram hruaitute duh dân zuia kan nun thiam a pawimawh. Pathian kan hmangaih tâwk lohnain a hrin chhuah chu inrin tawn lohna, inhmangaih tawn lohna leh inlungual lohna tiin kan sawi thei ang. India rama state râlmuang ber hi kan rilru a râlmuang em? Kan inhmangaih tawn tak tak em? Kan thla a muang tak zet em? Kan ram kal zêl dân tûr thlîr hian beiseiawmin kan hria em le?

Pathian kan hmangaih loh avâng hian kan chhôngkua leh khawtlâng pawh hi kan hmangaih thiam lo thîn. Mahni chauh inhmangaihtu kan pun zêl avângin chhôngkua

leh khawtlâng kan tapin kan mangang a, kan tlachhe tual tual a, in leh lo, sum leh pai lamah thang zêla kan inhriat lai hian chhiat lam kan pan niin a lang si! Kan ram hian min hmangaihtu kan hmangaih lêt tâwk loh avângin hmangaih zêl theih loh dinhmunah kan ding mai ang tih a hlauhawm ta. Kan mi mal nunah pawh hian Pathian hmangaih lotu chuan keimahni ngei pawh hi kan inhmangaih thiam lo a ni. Kan châk zâwng leh duh zâwng anga kan nuna, nuam kan tih zâwng hlîra kan tlan avângin mi tam tak chuan kan nun kan tichhe vek a, chatuan hremhmun lam kan pan ta thîn a nih hi, a pawl tak zet a ni.

Hetianga kan ram leh hnam dinhmun kan thlîr lai hian thlîrna tlâng dang aţanga thlîr chuan Pathian tâna mi rinawm, Lalpa hmangaih tlattu eng emaw zât he ram hian a la nei tih hi hai rual a ni lo. Chuvângin kan ram hi chhan tlâk a la awm. Pathian hmangaiha, a tâna nunga, rinawm taka a rawngbâwltu kan pun deuh deuh chuan he ramah hian kan chêng rei thei ang a, kan pung zêl ang a, kan lo hmuingil zêl dâwn a ni. Pathian thutiam hi a nghet a, a ding reng dâwn. Hêng thil tlêm tê kan sawi aţang hian kan ram leh hnam damna chu Pathian kan hmangaih hi a ni tih a lang Chiang hle mai. Keini chauh ni lovin kan tu leh fate, thang lo thar zêlten Pathian an hmangaih theih nân thahnem ngai îla, theih tâwp i chhuah zêl ang u.

SYNOD MODERATOR-IN JAIL TÂNGTE KRISMAS LEH KUMTHAR LAWMA A HMANPUI

Kum 2017 Krismas leh kum thar 2018 chu Synod Prison Ministry (SPM) programme siam zuiin Synod Moderator hovin Central Jail-ah hun hman a ni a, ni 25.12.2017 Krismas niah chawhma inkhâwm Rev. B. Sângthanga, Executive Secretary i/c SPM-in a kaihruai a, Synod Moderator, Rev. F. Lalrinnungan Pathian thuchah a sawi. Chawhnu inkhâwm chu Rev. R. Lalvulluaia, Director, Prison Ministry-in a kaihruai a, Dr. Laldinliana Vârte, Mission Vêng Pastor Bial KTP Leader-in thuchah tawi a sawi a, Rev. B. Sângthangan thu tawi a sawi baw. Chawhma leh chawhnu inkhâwm inkârah hian zai hona hun hlimawm tak an hmang a, tlaiah Krismas ruai tui tak an kîl ho a ni.

Synod Prison Ministry rawngbâwlna hi Mission Vêng Pastor Bial Zai-pâwlin an jawiawm a, anni kaihruaina hian zai hona hun hlimawm tak hman a nih bâkah solo leh skit te ngaihlâk a ni baw. Krismas hmanna tûr hian SPM chuan ₹25,000 a pe a, hetah hian Mission Vêng Kohhranin an rawn thawh ₹20,000 a tel a ni.

Kum thar 2018 lawmna hi District Jail, Aizâwlah hman a ni a, chawhma inkhâwmah Rev. R. Lalvulluaian inkhâwm a kaihruai a, Pathian thuchah Upa J. Lalzâmliana, Mission Vêngin a sawi. Chawhnu inkhâwmah Rev. B. Sângthangan inkhâwm a kaihruai a, Rev. F. Lalrinnungan Pathian thuchah a sawi. Mission Vêng Kohhran Biak Inpui Melodious Choir an zai a, zaithiam zai ngaihlâk a ni baw. Tlaiah kum thar lawmna ruai tuihnai tak kîl ho a ni. Krismas leh kum thar lawmna atân SPM chuan ₹15,000 a pe a, hêng sumte hi Mission Vêng Kohhran leh Tuikhuahtlâng Kohhran Hmeichhiaten an thawh aţanga pêk a ni.

District hrang hrangah pawh District SPM hruaitute kaihruainain advance Krismas leh Krismas Programme te District Jail-ah hman a ni a. Hêng District hrang hrangte Krismas hmanna tûr hian Synod Prison Ministry chuan ₹5,000 theuh a pêk bâkah District hruaitute hma lâknain Krismas thilpêk chi hrang hrang pêk a ni baw.

Râl Vêngtu

Khaw chhông mite chu mangang leh chiái takin Râl Vêngtu hnênah an lo kal khâwm a. An zîngah chuan nu pakhat meng phelh deuh phung hi a tel ve a, chu nu ber chu an rawn buaipui chu a lo ni a.

Mite: He nu hian nizân khân mumang a nei a. A mumangah chuan mi pahnih hi kawthlêrah an lo dîng a. Pakhat chu lianpui, pakhat zâwk chu tê reuhtê a ni. An bulah chuan thingfâk a awm bawk a. Vân ațangin awin, “**Chikchiribip, chikchiribip**, vaw hlum rawh u,” a rawn ti a. Chutihlai tak chuan a rawn harh ta a. A muhil thei ta lo va, a buai tawh tawh ta mai a ni. A mumang awmzia a hre bawk si lo. A mumang hi Râl Vêngtuin a hrilhfiah thei ang kan ti a, kan rawn hruai chawt mai a ni.

Râl Vêngtu: Mumang mai mai hi eng chen nge in buaipui dâwn? ‘Mumang a tam poh leh thu lawi lo a tam a ni si a, Pathian chu ãih zâwk rawh u,’ tih kha in chhiar ngai lo em ni? (Thu 5:7). Tûn tûm chu ka hrilhfiahsak phawt ang che u a. Tûn hnuah chuan hetiang thu lawi lo mai mai hi buaipui vak vak tawh suh ang che u.

Hei hi mumang hrilhfiahna chu a ni e: Kawthlêra mi pahnih dîng kha tûnlai mize chi hnih entîrna a ni. Pakhat zâwk (a lian zâwk) chu mi thil ãa tih pawh sawiselna ngawt zawng, mahni ãa ber leh tîng bera inngai, phunchiar tak, kherkhiap, hriatthiam mai tûra lang pawh hrethiam lo lui tlat a ni. Chutiang mi chu **mi chikchiribip** an ti. Heitiang mi hi tûnlai hian an tam zâwk mah nghe nghe. Heng mite hi thingfâka vuak hlum tûra a tih chu a ni.

Mite: Vuak hlum chu a va Pathian thu awm lo ve.

Râl Vêngtu: Vuak hlum tih lêmah, ‘chutiang mizia chu bânsan tûr’ tihna maw le. Kawthlêra dîng a tê zâwk chu thil a ãa zâwnga thlîr ãhîn, mi thil ãa tih pawh lâwmpui thiam, fak an ãul pawha fak hreh lo, sawisel aia faknain mi a hneh thei zâwk tih hria, a ãa leh tuang zâwng hlîra ngaihtuahna hmang (Positive thinking) ãhîn mi ang chi hi a ni a. Chutiang mizia chu kum 2018-ah hian vawng nung tlat rawh u tih a entîr a nih chu.

Mite: Râl Vêngtu, kan lâwm hle mai. Hei Mumangneii pawh a lo harh fîm ta a, a nuh vur hi, tiin an hâwng ta dam dam a.

SYNOD HOSPITAL, DURTLÂNG NOVEMBER, 2017 CHHÛNGA THILPÊK DAWNTE

I. CHARITY FUND

1) KÏP, Muallungthu Bial	Rs. 5,000/-
2) Pu Rochungnunga, Durtlâng Mual Vêng	Rs. 10,000/-
3) Lalchhuansânga te unau, Vênglui, Aizâwl	Rs. 1,000/-
4) Pu Laldanglova, Durtlâng Mêl 5	Rs. 1,000/-
5) Pu Lalramena, Durtlâng Kâwn Vêng	Rs. 1,000/-
6) Pu Lalsânglûra, Durtlâng Mêl 5	Rs. 1,000/-
7) Pu Rosâwmlîana Vârtê, Leitan	Rs. 1,000/-
8) Reiek Bial Kohhran Hmeichhia	Rs. 15,000/-
9) Pu Lalzuala, Kâwnpui Chhim Vêng	Rs. 100/-
10) Pi Lalziki, Kâwnpui Chhim Vêng	Rs. 100/-
11) T&T Medicentre, Mission Vêng	Rs. 2,600/-
12) Maubâwk West Kohhran Hmeichhia	Rs. 15,000/-
13) Pi Lalrosângzuali, Mission Vêngthlang	Rs. 1,000/-
14) Pi Lalbiaktluangi, Champhai Vêngthlang North	Rs. 2,000/-
15) Pu Zodiniana, Mission Vêng	Rs. 1,000/-
16) Upa PC Thanzuala, Sumsuih	Rs. 6,000/-
17) Rengtekâwn Kohhran	Rs. 4,770/-
18) Vairengte Bial Kohhran	Rs. 10,000/-
19) KÏP Airfield Vêng Bial	Rs. 3,000/-
20) Nursery Vênglai Kohhran Hmeichhia	Rs. 6,000/-
21) Guwahati Mizo Presbyterian Kohhran	Rs. 10,000/-
22) Pu F. Thangkhûma, Bethlehem Vêngthlang	Rs. 2,000/-
23) Pi Lalramngâki, W/A, Synod Hospital	Rs. 3,000/-
24) Lungdai Kohhran	Rs. 1,000/-
25) Pu Zodinglîana, Zârkawt	Rs. 3,500/-
26) Lungtan Kohhran	Rs. 3,000/-
27) NPPS, Vângtlâng Kohhran	Rs. 660/-
28) Sêrkhan Kohhran Pavalai Pâwl	Rs. 1,000/-
29) KÏP, Bilkhawthlîr Bial	Rs. 3,000/-
Total	Rs. 1,13,730/-

II. THISEN PETE

1. KÏP, Himali Bial, Laipuitlâng	13 Units
2. KÏP, Dinthar Branch, Aizâwl	34 Units
3. KÏP, Bâwngkâwn Bethel Bial	27 Units
4. NSS Unit & AMVMSA, College of Veterinary Sciences & Animal Husbandary, Selesih	36 Units
5. KÏP, Zotlâng Branch, Aizâwl	22 Units
6. KÏP, Luangmual Branch, Aizâwl	16 Units
7. KÏP, Hunthar Branch, Aizâwl	26 Units
8. M.I.T, Computer Center, Sakawrpului, Aizâwl	36 Units

PEK ZÂT

III. GRACE HOME TÂN

1. KÏP, Armed Vêng Branch, Aizâwl	Rs. 10,000/-
2. Dr. Vânlalsîama Chhangtê, Vaivakâwn - Wall Clocks 15 lei nân	Rs. 6,750/-

IV. THIL DANG PETE

1. KÏP, Vaivakâwn Vêngthlang Branch	Thutthlengsei leh dam lo harsate ãanpuina pawisa Main OT tân Wall Clock pakhat
2. T & T Medicenter, Mission Vêng	
3. Dr. H. Lalruatsanga, Bethlehem Vêngthlang	Krîsmas thilpêk Rs 2,000/-
4. Pu R. Lianhnûna, Biate	Hospital tân Rs 1,000/-
5. Lallen Bial Kohhran Hmeichhia	Hospital tân Rs 5,000/-
6. Home Mission School, Zârkawt	Naupang ni pual thawhlâwm Eye Ward tân Rs 20,000/-
7. Lungpho Kohhran Hmeichhia	Thutthlengsei 3
8. Pi Lalremmawii, Chaltlâng Dâwrkâwn	Damlote tân Krîsmas thilpêk Rs 5,000/-
9. Ramhlun Vêngthar Bial Kohhran Pavalai Pâwl	Compound sâmfai hnatlâng

V. PAWISA DAWN ZAWNG ZAWNG

i) Rs. 1,13,730/-
iii) Rs. 16,750/-
iv) Rs. 33,000/-

G. Total Rs. 1,63,480/-

VI. TIHDIKNA : Synod News Letter September thla chhuakah tih-sual palh kan nei a -

I. Charity Fund (9) Chanmari Presbyterian Kohhran Pavalai Pâwl, Aizâwl thilpêk Rs 1,000/- tih hi a dik lo va, Rs 10,000/- tih zâwk tûr a ni e. Tih-sual palhah ngaihdam kan ãil a. Tih dik loh kan la nei palh thei a, han sawi zêl bawng ang che u.

Khawngaihna leh duhsaknaa thilpêk min petute zawng zawng hnênah Lalpa Isua Krista hmingin lâwmthu kan sawi tak meuh meuh a ni. Heng in thilpêk kan dawnte hian dam lo awm man harsate thla-muang takin a awmtîr a, Hospital mamawh tam tak min phurûksak bawng a ni.

Sd/-(REV. R. RAMDINMAWIA)
Chaplain, Synod Hospital, Durtlâng.

OPERATION NEHEMIA OPEN AIR SERVICE

Synod Revival bum tumin December 27.12.2017 zân khân Aizâwl khawpui chhông hmun 20-ah Operation Nehemia, Open Air Service buatsaih a ni a, a hmun leh thuchah sawitute chu hetiang hi a ni -

Zemabâwkah Pu C. Lalnunsânga, Thuampuih Upa K. Lalhunpuia, Leitanah R. Lallungmuana, Bâwngkâwnah Upa T. Lalthlengliana, Ramhlun North-ah Upa Ramtharnghâka, Chaltlâng Dâwrkâwnah R. Zaihmingthanga, Chanmari kâwnah Upa C. Lalchullova, Dâwrpuiah Lalremruata, Vaivakâwnah Upa R. Lalhmachhuana, Temple Square (Tuikual)-ah Upa PC Lalhmachhuana, Mission Vêng (Sikulpuikâwn)-ah Vânlalvuana, Kulikâwnah Malsâwmthara, Khatlaah Joseph Zaihmingthanga, Mission Vêngthlangah Lalfakzuala, Bûngkâwnah R. Lalrinsânga,

Dintharah Jerry Lalãanpuia, College Vêngah K. Lalawmpuia, Bethlehem Vênglaiah Lalsânglûra Râlte, Chhînga Vêngah C. Lalramthara, Electric Vêngah Henry Lalhmingthanga te an ni a. Synod Revival Speaker-te leh team member Aizâwla mite chu an vêng hnai remchâng apiangah an tel thung. He programme lo buaipuia lo ãawiam tûr kohhran te, Revival Committee ațanga ãawiamtu tûrte ruahman a ni a. A lo buaipuitu kohhrante hnênah hian ₹5,000 ãeuh pêk an ni

Krîsmas leh kum thar vuak vêtah Aizâwl dai vêl hmun hrang hrangah feh chhuah a ni a, hêng hmuna hian ruahman lâwk angin hun hman a ni a, chawh rualin zan khatah mi 200 chuang ãawngtaipua leh titipua hun hman ãhîn a ni.

MISSIONARY ORIENTATION TRAINING LEH TIRH CHHUAH INKHÂWM

Synod Mission Board chuan Missionary a lâk thar mi 69 te tân January 10 ațanga February 2, 2018 chhông hian Mission Vêng Kohhran Hall-ah Orientation Training a buatsaih a, Training-ah hian Missionary hna thawh thar tûrten an rawngbâwlna hmun an pan hmaa an hriat tûr chi hrang hrang zirtîr an ni.

Missionary lâk tharte hi a huhova thlahna February 4, 2018 (Pathianni) chawhnu ãar 1:30-ah Chawnpui Kohhran Biak Inah hman tûra ruahman a ni a, tîr chhuah inkhawm zawh hi chuan an thawhna tûr hmun ãeuhvah an kal tawh ang.



BAWNGKAWN KOHHRAN Pavalai Pâwlte chuan kum 2017 chhûnga Lunglei Presbyterian Kohhran tlawh Project-ah neiin ni 26.11.2017 (Sunday) hmangin member 49 lai chuan Lunglei Vênglai Pastor Bial chhûnga kohhran panga leh John Williams Hospital tlawhin rawngbâwlna an nei a. John Williams Hospital tân hian O2 Concentrator Rs. 56,000/- man leh Steel Almairah pahnih Rs. 36,250/- man (a vaiin Rs. 92,250/-) an pe a. Lunglei Vênglai Pastor Biala kohhran pangate hnênah Dekchi lian, PA Set leh pawisa fai (Rs. 32,000/-) an hân baw.

SÂWMNA

* Ni 15-18 February, 2018 chhûng hian Dârlâwn Bial Kohhran Hmeichhia chuan Bial Inkhâwmpui rualin Dârlâwn Bial Kohhran Hmeichhe Golden Jubilee a lâwm dâwn a. He hun hmanpui tûr hian Dârlâwn Pastor Biala Kohhran Hmeichhe member lo awm tawh zawng zawngte an sâwm a ni.

* Ni 21 January, 2018 hian Tlungvêl Field Vêng Kohhran chuan Golden Jubilee hawna inkhâwm an nei dâwn a. Golden Jubilee lawmna pui ber erawh chu ni 5-6 April, 2018 ah neih tûr niin he hun hmanpui tûr hian Tlungvêl Biala Pastor lo ni tawh zawng zawngte leh he Kohhran lawi tawh zawng zawngte an sâwm a ni.

BIAL HMUI NGAI HMUITU TÛRTE

Synod Officers Meeting (OM 3 of 12.12.2017) chuan Bial hmui ngai leh a hmuitu tûr hetiang hian a ruat:

1. Mamit Bial -
Rev. Lalchuanawma, Mamit Hmunsâm.
2. N. Vanlaiphai Damdawi Vêng -
Rev. Zodinpuia, N. Vanlaiphai.
3. Sialhâwk Bial -
Rev. H. Malsâwmzuala, Khawhai South.
4. Zobâwk, Lunglei Bial -
Rev. C. Lalduhawma, Lunglei Chanmari.
5. Khuanglêng Bial -
Rev. H. Lalrinsânga, Vânzau.
6. Bilkhawthlîr Bial - *Rev. Michael Lalchuanawma, Bilkhawthlîr Hmârvêng.*
7. Sihphîr Vêngthar Bial -
Rev. C. Sâpkai, Sihphîr.

BIAL THAR HAWN LEH PASTOR INDUCTION

Synod 2017-in a lo rêl tawh angin Pastor Bial thar 12 (Mizoram chhûng 4, Mizoram pâwn 1, Mission Field 4 leh Masihi Sangati 2) te chu Dt. 13.1.2018 khân hawn fel a ni ta. Mizoram chhûnga Bial thar hawn leh a hawngtute chu hetiang hi a ni:

Sl.	Bial thar hming	Hawngtu
1.	East Lungdâr Vênghlun Bial	Rev. F. Lalrinnunga, Synod Moderator
2.	Chhingchhîp Mualpui Bial	Rev. B. Sângthanga, Executive Secy.
3.	Kolasib Vêngthar Bial	Rev. P.C. Pachhûnga, Executive Secy.
4.	Hmâwngbu Bial	Rev. R. Lalnuntluanga, Synod Statistician

Masihi Sangati Bial thar - Hmârthlang (Station: Kolasib Diakkâwn) leh Khawchhak (Station: Keifâng) hawn thar a ni baw. Synod Inkhâwmpui 2017-in Pastor leh Pro. Pastor a tawh chêt leh lak tharte chu an awmna tûrah Dt. 14.1.2018 khân Induction neihpui an ni a. Kum 2018 April thlaa zir zo tûr mi pangate dah ngheh hun atân May 13, 2018 ruat a ni a, Sihphîr Vêngthar Biala awm tûr Rev. V.L. Luaia Hânleh hi PCI Assembly Inkhâwmpui zawh fel hun June 3, 2018-ah Induction neihpui a ni thung ang.

SYNOD OFFICE LÛT LEH CHHUAK

Kum 2018-ah hian Synod Office chhuahsan mi pariat an awm a, an zînga pali – Rev. Lalzuithanga (Out-going Moderator), Pu C. Kâpthanga (SMB), Pu K. Ronghaka (SMB) leh Pu Zoremthanga (Driver)-te chu pension-a chhuak an ni a, pali dangte erawh chu Synod inkhâwmpui leh committee-in an awmna hmun tûr a ruatte an ni. Thawktu hmun danga insawnte chu:

1. Ni. Vânlalsâwmi, Co-ordinator, MSSU chu Supetintendent, Hmangaihna In, Durtlângah.
2. Pu H. Vânlalchhuanga, Synod Mission Board Supervisor of Schools chu Warden, Ramthar Hostel, Mission Vêngthlangah.
3. Pu K. Lalruatlina, OA, Synod Mission Board chu MDTC, Bualpuiah.
4. Rev. R. Lalhmingthanga, Director, Family Guidance & Counselling Centre chu Pastor i/c Mission Vêng Bialah.

Tin, hmun dang aţanga Synod Office-a lût thar mi 12 an awm baw a, chûngte chu:

1. Rev. F. Lalrinnunga, Moderator
2. Rev. Lalsângbera, Director, FG&CC
3. Rev. Ramngaihawma, Counsellor, FG&CC
4. Rev. C. Lallungmuana, Counsellor, FG&CC
5. Rev. Hmingdailova, MSSU
6. Pi Laldâwnkimi, Asst. Cordinator, MSSU
7. Pu albert Lalhmangaiha, Asst. Co-ordinator, Synfo
8. Pu T. Lalchhuangliana, Mission Promoter, Synod Mission Board
9. Pu Lalbiaknunga, OA, Synod Mission Board
10. Pu K. Laldawngliana, OA, Synod Mission Board
11. Pu TC Lalruatfela, OA, Synod Mission Board
12. Pu C. Lalronghâka, Synod Mission Board

Anni bâkah hian Synod Office-a awm sa, awmna hmun siam rem mi pali an awm a, chûngte chu: Pi Zothansiami, OA, Archives chu MSSU-ah. Pu PC Lalramliana, OA, Gen. Administration chu Archives-ah. Upa Lalrosânga, OA, MSSU chu Gen. Administration-ah. Rev. Zoramsânga, MSSU chu Social Front-ah. Tin, nikum lama Synod Service Board-in Junior Engineer atâna a lâk thar, Tv. Lalhriatrenga, Bethlehem Vêngthlang chuan a hna a zawm thar baw.

MODERATOR-IN NURSING COLLEGE BUILDING LUNGPHÛM A PHÛM

Ni 10 January, 2018 zîng dâr 7:00 khân Synod Moderator Rev. F. Lalrinnungan Nursing College building lungphûm a phûm.

Synod Hospital, Durtlâng-a Nursing School chu Nursing College-a hân kai tûrin Synod Inkhâwmpui 2017 khân a lo rêl tawh a. Nursing College Building hi sak thar a tûl tawh avângin a

sakna tûr sum NEC-ah dîl a ni a, College building sakna tûra pawm chêng nuai 833 aţangin chêng nuai 749.70 chu NEC aţang hian hmuh beisei a ni a.

College building hi a dung fit 150 leh a vâng fit 45-a zau, chhâwng li-a sak tûr a ni a, zirlai 140 vêl leng thei tûr a ni.

PC GIRLS SCHOOL ADMISSION

Kum 2018-2019 Session atân PC Girls' School-ah ni 12 January, 2018 aţangin Class A - Class VIII Admission a tih leh theih ta e.

PC Girls' School hi Zosap Missionary-ten an din, Mizorama Hmeichhe Sikul awm chhun a ni a. Zirna lam chauh ni lovin naupangten an chhawr tângkai theih tûr Pathian thu (Scripture) te, Tonic Solfa leh kut themthiamna chi hrang hrang zirtîr tel an ni.